

陸放翁全集

劍南詩稿

冊十

劍南詩稿目錄

卷第四十三

東園小飲四首

病退頗思遠遊信筆有作

春晚閒步門外

嘲布穀

題齋壁

龜堂晚

興長干行

養生

園中觀艸木有感

恩

賜龜紫二首

自警

獨夜

雨夕枕上作

喜晴

觀運糧圖

宇文袞臣吏部予在蜀日

與之遊至厚契闊死生二十年矣庚申三月忽

夢相從如平生愴然有賦

阿媿

初夏

讀

書

喜晴

初夏北窗二首

書適

幽居初

夏四首

獨醉

獨立

高臥

趙彥膚修撰

挽辭

讀香奩集詩戲効其體

野步至村舍

莫歸

述悲

江東韓漕晞道寄楊庭秀所贈

詩來求同賦作此寄之

雨夜

小橋

自笑

入梅

雨夜

燕

午枕

項里觀楊梅四

首

夜歸

五月十一日睡起

示客

雨中

作舟中遣興 自嘲 齋中雜興十首以丈

夫貴壯健慘戚非朱顏爲韻 夏五月方閔雨

忽大風雨三日未止二首 遣興二首 六月

一日曉賦 露坐 夜賦 乙夜納涼 五鼓

老態 枕上聞風鈴二首 寄贈湖中隱者

觀畫山水 六月十八日立秋未旦起行山

園口占 新秋 晨起自山園歸書室 初秋

小雨 出遊 對酒 自勉 新涼 醉中題

民家壁 秋景 舟中作 雜興四首 自詠

閒適 近村莫歸 秋興 讀史有感三首

劍南詩稿卷第四十三

宋陸游務觀

東園小飲

少年萬里走塵埃歸臥柴荆晝不開
十事真成九敗意一春知復幾銜杯
波清憑檻觀魚樂風緊鉤簾待燕回
催喚比隣同晚酌旋燒笙筍摘青梅

又

入東又見幾春風
茆屋蘆藩寂寞中
道業雖如詩不進
世緣已與夢俱空
高枝濯濯辛夷紫
密葉深深躑躅紅
村巷斷無軒蓋到
一樽猶得伴鄰翁

又

三月園林日漸長
閑從鄰曲答年光
醅醕獨殿羣芳後
醺醕能令萬事忘
下豉蓴羹誇舊俗
供鹽梅子喜初嘗
烏靴席帽知何樂
自古京塵眯眼黃

又

乞得殘骸老故山
艸亭終日對孱顏
孤雲百尺起江際
幽鳥數聲鳴竹間
衆死一身今獨健
人忙萬物本常閑
此心欲語知誰聽
賴有漁樵日往還

病退頗思遠遊信
筆有作

平日身如不繫舟
曾從楚尾客秦頭
風生江浦千帆曉
月落山城一笛秋
萬事只能催白髮
百年終是臥荒丘
扶衰強項君休笑
尚憶人間汗漫遊

春晚閑步門外

病退扶行力尚微
悠然隨意出荆扉
蜂貪釀蜜爭花去
燕喜分泥傍水飛
午渴圻瓶嘗煮酒
晴暄開筍換單衣
躊躇已久歸猶嬾
更向溪頭坐釣磯

嘲布穀

時令過清明
朝朝布穀鳴
但令春促駕
那爲國催耕
紅紫花枝盡
青黃麥穗成
從今可無語
傾耳舜弦聲

題齋壁

出郭無十里結廬纔數間每將窮博健不遣樂妨閑
賣藥雲邊市尋僧雨外山何妨搖櫂去却作跨驢還

龜堂晚興

九日春陰一日晴回塘閑院愜幽情小魚出水圓紋
見輕燕穿簾折勢成今日掩關真佚老向來涉世亦
遺名巡簷更有欣然處新筍初抽四五莖

長干行

裙腰綠如艸衫色石榴花十二學彈箏十三學琵琶
寧嫁與商人夫婦各天涯朝朝問水神夜夜夢三巴
聘金雖如山不願入侯家鄣袖庭花下東風吹鬢斜

養生

受廛故里老爲氓三十餘年學養生情盼作妖狐未
慘肥甘藏毒醢猶輕忠言何啻千金藥赤口能燒萬
里城陋巷藜羹心自樂傍觀虛說傲公卿

園中觀艸木有感

木筆枝已空玉簪殊未花蘋桐時更晚春盡始萌芽

老人多感慨俯仰悲歲華兩曜如奔輪疾去不可遮
城頭插雙旗疊鼓催清笳兀然一室間不復過鄰家
午睡或至莫亂髮垂髭髭所嗟瘦僧死莫致茶山茶
茶山僧道省歲餉新茶今死已再歲矣

恩賜龜紫

憶昔青衫上赤墀領間未有一莖絲豈知晚拜金龜
賜却是霜髯雪鬢時

又

已挂朝衣神武門暫紆紫綬拜君恩兒孫賀罷還無
事雨笠煙蓑自灌園

自警

少年不自量妄意慕管葛晚節雖知難猶覲終一豁
悲哉老病馬解縱誰復秣旣辭筮轡勞始愛原野闊
飲澗齧霜菅亦可數年活勿復思長途嘶鳴望天末

獨夜

一生食太倉蠹耗均雀鼠雖云久置散飢飽尚撐拄

兩年失微祿始覺困羈旅傾身營薪米得食已過午
人觀不堪憂意氣終自許藜羹若大庖艸廬如萬礎
平生師顏原本自藐晉楚悠然臥北窗殘燈翳還吐
雨夕枕上作

喜晴

澤國風雨多春盡尚裘褐閑門不能出飽受鳩婦聒
今朝雲忽歸溝水清活活偶爲東園行魚鳥閒何關
婦女蠶事終桑柘光如發布穀汝勿憂吾袴真可脫
觀運糧圖

王師北伐如宣王風馳電擊復土疆中軍歌舞入洛
陽前軍已渡河流黃馬聲蕭蕭陣堂堂直跨井陘登
太行壺漿簞食滿道傍芻粟豈復煩車箱不須絕漠
追敗亡亦勿分兵取河湟但令中夏歌時康千年萬

年無餽糧

宇文袞臣吏部予在蜀日與之遊至厚契闊死
生二十年矣庚申三月忽夢相從如平生愴然
有賦

英姿爽氣宇邛州雖古人中豈易求六月長途將竭
死一天風雹起龍湫

阿姥

城南倒社下湖忙阿姥龍鍾七十強猶有塵埃嫁時
鏡東塗西抹不成粧

初夏

雨足移秧後風和剝繭初昏昏時就枕貿貿却尋書
晚步身須杖晨興髮廢梳滿城車馬客誰復問何如

讀書

稽古衰猶力翻書夜達晨思人頻掩卷感事忽霑巾
世閱幾春夢身今一老民忍窮端已慣蔬食又經旬
喜晴

江湖春莫多風雨點滴空堦實厭聽
剩喜今朝有奇事一窗晴日寫黃庭

初夏北窗

作墨無聲紫玉池年光又入放翁詩
風和柳岸吹綿後雨足瓜畦引蔓時
病酒相如無奈渴清言叔寶不勝羸
此生豈復功名事付與城頭畫角悲

又

水際柴荆晝不開臥聽微雨雜輕雷
春蠶滿箔眠初起社燕爭巢去復來
海檜屈蟠依怪石山榴零落點蒼苔
一樽及此風光美車下長坡底用推

書適

老人去健羨飯足便有餘此外一壺酒
薦以園中蔬手種數畦花時開一編書
近者苦足蹇復營一柴車時時訪溪父
亦或遊僧廬上下山澤間視身等禽魚
既歸則浩歌幽抱亦少攄一笑謂兒子
不須起犂鋤幽居初夏

路綽長隄北家居小市西陂塘晨飲犢門巷午鳴雞
婦喜蠶三幼鄉中謂蠶眠爲幼兒誇雨一犁衰翁亦放

浪未怕履露泥

又

梅塢青黃子艸陂紅紫花雙鵝朝戲浦羣鴨莫還家
赤腳挑殘筍蒼頭摘晚茶出門逢野老滿意說桑麻

又

詰曲穿桑徑謳啞響竹門疏泉灌藜莧倚杖牧雞豚
江步橫新舸茅簷弄幼孫太平端有象誰與畫吾村

又

大臺光陰短南詵日月長松枯宜倒壑龜老慣撐牀
寂寂三升稷悠悠百本桑飢寒猶骯髒何術致吾盲

獨醉

老伴死欲盡少年誰肯親自憐真長物何啻是陳人

江市魚初上村場酒亦醇頽然北窗下不覺墮紗巾

獨立

午醉初醒後回廊獨立時斜陽明雨葉乳鵲裊風枝
違俗雖堪笑師心頗自奇傍人疑徙倚向道是尋詩

高臥

省戶歸來不計年悠然高臥鏡湖邊釣簾每對千峯
雨接竹新分一脈泉學問誠身元有道阮窮知我豈
非天虛名自古能爲累正恐人看直一錢

趙彥膚修撰挽辭

朝路英聲早宗盟宿望尊讌談推醞藉大筆擅雄渾
許國心猶壯安邊策具存悽涼故時客痛哭望秋原
讀香奩集詩戲効其體

金鋪一閉幾春風咫尺心知萬里同麝枕何曾襖夢
惡玉壺空解貯啼紅畫愁延壽丹青誤賦欠相如筆
墨工一事目前差自慰月明還似未央中

野步至村舍莫歸

艸徑盤紆入廢園漲餘野水有殘痕新蒲漫漫藏孤
艇茂樹陰陰失近村拄杖敲門求小憩老盆盛酒瀉

微渾興闌却覓橋邊路數點歸鴉已帶昏

述悲

屏居不出門終歲袖手坐但怪意氣衰那覺日月過
故人爲冢丘老伴餘幾箇天高鬼神惡回天夷齊餓
遺魂一零落豈復聞楚些且當醉濁醪吾夢行亦破
江東韓漕晞道寄楊庭秀所贈詩來求同賦作

此寄之

三朝巍巍韓侍中爛然彝鼎書元功西戎北狄問安
否九州萬里涵春風子孫繼踵皆將相我猶及拜西
樞公顧憐通家略貴賤勞問教誨均兒童西樞有孫
又奇偉凜然太華摩蒼穹小試玉節江西東文書如
海到手空政成蒲鞭亦不用地上錢流倉粟紅君持
此手上廊廟折衝禦侮知從容桑乾不勞尺箠下榆
關正可丸泥封却歸故里訪遺老應記山陰九十翁

雨夜

麥熟家家喜墮涎龜堂依舊突無煙雨中更覺淒涼

甚一點殘燈守蠹編

小橋

漠漠輕陰隱隱雷石榴半落點莓苔小橋西北闌干
角獨岸綸巾待雨來

自笑

三間茅屋寄滄浪鳥出樊籠馬脫韁
灩灩陂塘秧水滿陰陰門巷麥風涼
蔬盤旋采溪毛滑篷艇新編露箸香
捐盡浮名方自喜一生枉是伴人忙

入梅

微雨輕雲已入梅石榴萱艸一時開
碑償宿諾淮僧去卷錄新詩蜀使回
墨試小螺看斗硯茶分細乳玩毫杯
客來莫謂兒嬉事九陌紅塵更可哀

雨夜

小雨收仍落孤燈翳復明衰殘書易忘
憂患夢多驚熠熠螢矜暗翻翻雀轉更
閉門行老死亦足慰平生

燕

初見梁間牖戶新銜泥已復哺雛頻只愁去遠歸來
晚不怕飛低打著人

午枕

茅簷一杯淡藜粥有底工夫希鼎鍊書中至味人不
知雋永無窮勝梁肉老夫享此七十年每媿天公賦
予偏清泉洗醺煎山茗滿榻松風清晝眠

項里觀楊梅

山前五月楊梅市溪上千年項羽祠小繖輕輿不辭
遠年年來及貢梅時鄉俗謂楊梅止曰梅

又

隔歲租園不計錢楊梅海裏過年年癡人只競閑名
利那信三山是地仙

又

溪流曲曲樹陰陰人語煙中覺塢深把定山僧同一
笑明年強健更相尋

又

山中戶戶作梅忙火齊驪珠入帝鄉細織筠籠相映
發華清虛說荔枝筐

鄉俗謂選擇楊梅爲作梅

夜歸

城角傳三弄桑村喜獨歸雨多螢滿野徑狹露沾衣
食儉鹽醯薄年衰氣力微青燈對兒女撫事一歔歔
五月十一日睡起

病眼慵於世事開虛堂高臥謝氛埃簾櫳無影覺雲
起草樹有聲知雨來茶碗嫩湯初得乳香篝微火未
成灰脩然自適君知否一枕清風又過梅

示客

世間可笑走踈踈誤認虛空作汝身已覓餘名潤枯
骨更謀厚積遺何人風旛畢竟非心境瓦礫何妨是
道真新藕出泥瓜上市爲君一醉墮紗巾

雨中作

雨聲一滴不肯住客夢欲成還自驚白水陂邊破茅
屋亂書堆裏老儒生出行豈復有流輩未死尚能躬